

on 09 June 2014



Timbalan Naib Canselor (Akademik dan Antarabangsa) UNIMAS, Profesor Dr Fatimah Abang menerima dokumen lafaz ikrar pelajar daripada Mohd Khairul Azwan.



“ Ikrar pelajar...” Lafaz ikrar dibuat oleh pelajar-pelajar baharu UNIMAS untuk mematuhi segala peraturan dan akta dalam universiti.

KOTA SAMARAHAN, 6 Jun 2014 : Seramai 758 pelajar melafazkan ikrar sebagai pelajar baharu dalam Majlis Ikrar Pelajar yang diadakan pagi tadi bertempat di DeTAR PUTRA, UNIMAS.

Majlis lafaz ikrar tersebut telah diketuai oleh Mohd Khairul Azwan bin Mohamed Noor di hadapan Timbalan Naib Canselor (Akademik dan Antarabangsa) UNIMAS, Profesor Dr Fatimah Abang, Timbalan Naib Canselor (Penyelidikan dan Inovasi), Profesor Dr.Kopli Bujang, Pemangku Pendaftar, Haji Abu Bakar Ibrahim, Dekan-dekan, Timbalan-timbalan dekan, Pengarah-pengarah, Ketua-ketua Pusat tanggungjawab, Ahli-ahli Senat dan Pensyarah-pensyarah.

Majlis berkenaan merupakan kemuncak kepada Majlis Aluan Pelajar (MAP) bagi program Asasi Sains yang telah diadakan selama seminggu bertujuan mengalu-alukan kedatangan pelajar baharu bagi sesi 2014/2015.

Lafaz ikrar pelajar sebagai tanda mematuhi segala Akta, Perlembagaan, Statut dan peraturan Universiti serta iltizam untuk memanfaatkan peluang dan menjaga nama baik universiti ini.

Dalam teks ucapan Naib Canselor yang dibacakan oleh Profesor Dr Fatimah, beliau menekankan kebertanggungjawaban pelajar baharu untuk menampilkan sikap dan budaya yang matang dan menjadi pewaris kesinambungan pembangunan negara kelak.

“ Sikap-sikap negatif, sambil lewa, malas dan suka bertangguh perlu disingkirkan dan diganti dengan budaya kecemerlangan seperti pemikiran positif,” katanya. Naib Canselor memberitahu menerusi transformasi yang dilaksanakan dalam Pelan Pendidikan Malaysia, akan melahirkan ‘pelajar nano’ yang dapat memberi impak yang tinggi kepada pertumbuhan ekonomi negara.

Beliau turut yakin perspektif akademia baharu yang menjadi kerangka kepada seluruh warga universiti juga akan membantu dan mempertingkatkan potensi pelajar secara holistik berkonsepkan pengalaman kampus secara total.